

## *Xroon yóxin tsíkjin*

# Pedro

### **Xrankíxixín nixja Pedro**

**1** <sup>1</sup>Janhan Simón Pedro, t'ahá ixra Jesucristo. Mé ikjian ti xroon í ts'ayéhéra kixin ó tinkachónkira Ìnchéni éxi tinkáchónkini kixin imá jína Díos la ko Jesucristo, ti nkexro tsaáxini. <sup>2</sup>Díos sintañaora la ko tsjajon ch'an kjuaxróxin kixin ó choxínra nkexrín itjen Díos la ko Ìnchéni Jesús.

### **Jína chrók'uejó ti sin tinkáchónki Jesús**

<sup>3</sup>Díos kjuajon kjuachaxin tsochóntani kaín ti nkehe tichánxihini kixin chrók'uejóni jína éxi tjinkaon ch'an. Kjuajon ch'an kaín tíha ti ó kjuako ch'an nkexrín itjen ti nkexro k'uéyehé ti jeheni kixin ts'ejókoni ch'an ti itjen ti kjuachaxin ijié chóna ch'an. <sup>4</sup>Mé xíkaha kjuajon ch'an kaín ti nkehe imá tjetoan la ko imá tjete, kixin chrók'uayehéra kjuachaxin la chrók'uejora jína éxi jehe ch'an la ko chrókuítöhéra ti nkehe jínahña síin chjasintajni. <sup>5</sup>Méxra tinkachónkira Ìnchéni la chrókjuéyára kixin chrók'uejora

jína; ndá ti tjejora nkojína ndá chrókónohara nkexrín itjen Díos; <sup>6</sup>ndá ti chrókónohara ndá chrókjuachara chrókjuénkayáxinra jína la ko jína chrók'uetuehén asánra; andá ti tjénkayáxinra jína ndá chrókjuachara chrókónínkákonhñara tjoka; andá ti tónínkákonhñara tjoka ndá chrókjuachara chrókjuínchexiteyéhéra Díos; <sup>7</sup>andá ti chaxín nchexiteyéhéra Díos la chrókjuachara chrótjuehéra kichuara; ndá ti tjehehéra kichuara la chrókjuachara chrótjuehéra kaín chojni.

<sup>8</sup>Andá ti xíkaha tjejoch'era la tinkák'ánkí ti kjuaxrexinkaon kuéntára, la jehya ó chónkó kuitekáonra Ìnchéni Jesucristo. <sup>9</sup>Andá ti nkexro tjejónchexiteyáhya tíha la éxi ijnko chojni t'ikonhña o ijnko chojni t'ikonhña ikjín, kixin ó k'uitjáñehen sin kixin Ìnchéni la ó kjuínchetjóá ch'an ti ijié k'uéchóna sin. <sup>10</sup>Méxra kíchóni, nkojína chrók'uejora ndá chaxín tsonohara kixin Díos tsíkjejá ti jahara la ko tsík'éyahara ch'an. Ti xíkaha tjároxinra la xitjahya ts'itsinkara. <sup>11</sup>La Díos

tsotjáhara kjuachaxin ts'ixehénra ti itjen Ìnchéni Jesucristo t'etoan nkochríxín, jehe ch'an mé ti nkexro kjuínchekaá ti jeheni.

<sup>12</sup>Méxra janhan titoahya ntáxráxinkaonra kaín tíhi, kjónté ó nohara ti nkehe chaxín, la ko jína tjejora éxi ti nkehe xráko'hara senó. <sup>13</sup>Ndáxrjan kixin jína chrókjuintaxráxinkaonra kaín ti nkehe í, ti naxa itjén ntihi chjasintajni, <sup>14</sup>kixin Ìnchéni Jesucristo kjuínchenona kixin í séhya ndá its'én janhan. <sup>15</sup>Méxra ntáxráxinkaonra kaín tíhi kixin ti ó its'én la tsoxraxinkáonra nkochríxín kaín ti nkehe kjuákohára.

#### Ti sin k'uíkon ti kjuachaxin kuènté Cristo

<sup>16</sup>Ti nkehe kjuákohára kuènté ti kjuachaxin ijié chóna Ìnchéni Jesucristo la ko ti nkexrín tsokjan ch'an la jehya ijnko cuento kjuít'ána kixin chrókjuit'ayahínra. Náhí. Ikuan k'uíkonxian Ìnchéni la ko ti kjuachaxin ijié chóna ch'an. <sup>17</sup>\*K'uíkuan tíha ti ó It'eni Díos kjuíkosáyehe ch'an ti Xjeen ch'an, la kuihan nixja Díos itjen nkaya nkajní ndáchro: "Tíhi mé xjana imá tjuaha la ko chàna kixin itjen ch'an." <sup>18</sup>Mé xikaha kuihan ti itén Díos kuixin nkaya nkajní ti ó kjuak'ékian Ìnchéni chritaón ti ijna tjóá.

<sup>19</sup>Mé xikaha nonaxian kixin chaxín ndoá ti nkehe tsíchronka

ti sin tsíkjin itén Díos ósé. Méxra chrókuihínra jína ti nkehe k'uéndáchro sin kixin ti itan mé éxi ijnko xrohi ts'inkaséñaxín ti sitie hasta tsjixrakájna ti ñao ts'inkaséña ti ó itsi ti konotsé t'inkaséñaxín ti nchítjen la tíha ts'inkaséñaxín asánra. <sup>20</sup>Méxra imá tjeoan kixin chrókónohara tíhi: kixin ninkehó ti xroon itén Díos tsík'óna, la jehó chojni chrókjua'cha chróchronkaxín ti tan i. <sup>21</sup>Náhí. Ti nkexro k'uéchronka itén Díos la nixjahya sin ti nkehe jehó sin kjuénkayáxin sin. Náhí. Jehe sin imá kuitekaon sin Díos andá ti Nchakuén Díos mé kjuínkítsa nixja sin ti itén ch'an.

#### Ti sin tjako ti nkehe nduáhya (Jud. 4-13)

**2** <sup>1</sup>Kjaxin ósé kuék'íxin chojni nduáhya k'uéchronka itén Díos ti chjasin Israel, éxi ijie ts'ixin maestro sit'ayahara. Jehe sin tsochr'ákjehen sin nkehe nduáhya ts'itjáñaxín ti nkehe chaxín nohara, la xikaha sitékákonhñara Ìnchéni ti nkexro tsaáxinra. Tíha mé tsjixin ti ts'itjáñaxín sin.

<sup>2</sup>Nchónhña chojni tsochréhe ti nkehe jínahña tsjakoxin sin la xikaha ts'ándaxiexín chojni ti ntja ndoá kuènté Ìnchéni. <sup>3</sup>Jehe sin imá tsoxríhin sin tsochóna sin itsjé chichaon, la xikaha tsjanhahara sin chichaon kixin ti nkehe nduáhya tsjako sin. Kjánchó

ti nkehe ts'itjáñaxín sin la ósé tjechóhen la kohya nkexrín tsaá sin.

<sup>4</sup>Méxra Díos, la kjónté ti sin ángel ti ó kjuasin ijie la kuikonoéhña ch'an, la k'uetoan ch'an kixin tsjasóte sin, la sákjuí sin ti sítie ts'ejóchjina sin, la ntiha tjejóchrexin sin cadena tsjixrakájña ti ñao tsitoexín ijie sin. <sup>5</sup>\*La ko kuikonoéhña Díos ti sin k'uejé chjasintajni ósé la ichr'án ch'an ichrin la kuitee ìnta ti sin jínahña, la jehó kjuínchekaá ch'an Noé, ti nkexro kjuako ti itan jína la ko yato chojni ó. <sup>6</sup>\*Kjixin kjuínchek'itjáña Díos ti chjasin Sodoma la ko Gomorra, iche hasta k'óna nteso, kixin xikaha chrókonohe kaín ti chojni jínahña ts'ejó chr'éxin kixin kjixin sin tsjasóte sin. <sup>7</sup>\*Kjánchó Díos kjuínchekaá ti ch'in Lot, ijnko chojni jína, la kóxakohen ch'an ti k'uíkon ch'an ti ijie kjuasin ti sin jínahña. <sup>8</sup>Ch'in Lot, ti nkexro jína asén, mé kjuák'e ch'an ti síin ti sin jínahña la kaín ñao k'uává asén ch'an kixin k'uíkon ch'an la ko kuíhin ch'an ti nkehe jínahña ich'e sin. <sup>9</sup>Méxra Ìnchéni la nohe nchekaá ti sin kaín asén titekaon ti jehe ch'an, kjónté nchónhña nkehe náxrjónhña ts'atsínka sin. Andá ti sin jínahña la sinchekjasóte ch'an ti ñao tsitoexín ijie kaín chojni.

<sup>10</sup>Díos sinchekjasóte ti sin nchexiteyéhe ti nkehe jínahña ndáchro asén sin, andá nchexiteyéhya sin ti nkehe t'etoan Ìnchéni. Titekakonhña sin la ko chrakonhña sin t'ándaxíhin sin ti sin ángel chóna kjuachaxin. <sup>11</sup>Andá ti sin ángel, kjónté imá tsehe sin la ko chóna sin kjuachaxin, la tjanchehya sin Ìnchéni kixin sinchekjasóte ti sin jínahña.

<sup>12</sup>Andá ti chojni a, la éxi iko tjenkayáxinhña sin la nchexiteyéhe sin ti nkehe ndáchro asén sin, la ó k'okjíexiën sin kixin sich'e sin ti nkehe jínahña, andá íso chojni tsotsé ti jehe sin la ts'óná sin, éxi ijnko iko xikaha. <sup>13</sup>Mé xikaha tsjasóte sin kixin jehe sin kjuínchekjasóte sin íso chojni, la tóxrínhin sin sich'e sin ti nkehe ndáchro asén sin kjónté t'ikon kaín chojni. Ijnko kjuatosuéhe kixin tjejontaxínra ntekoara sin ti kia, la kjónté xikaha, naxa tjasin sin ijie.

<sup>14</sup>Ti ó t'ikon sin nkojín chojnichjin la tjinkaon sin chrókjuasinko sin ijie. Ch'iyehé sin ti sin noehña la imá tjinkaon sin tsochóna sin kaín ti nkehe ndáchro asén sin. La xikaha imá tjasin sin ijie, méxra chaxín tsjasóte sin. <sup>15</sup>\*Kuítóhe sin ti ntja ndoa la chréhe sin ti ntja kuènté Balaam, xjeen ch'in Beor, kixin kóxríhin ch'an chrókjuacha ch'an nchónhña chichaon kixin

ti nkehe jínahña k'uékjich'e ch'an. <sup>16</sup>Ndá ijnko kolócho chjin xitjahya nixja la nixjaxin itén chojni la xrenduéhe ti ch'in Balaam kixin ti ijje chóna ch'an, ndá kuítóhe ch'an ti kjualonti chrókuích'e ch'an.

<sup>17</sup>Ti chojni nduáhya tjako i la éxi ijnko tòye tjáhya ìntà la ko éxi itji sátiiko xrinto ó. Ó kjuixin kuitoxín kixin sátsji sin ti antsí sítie, tsjasóte sin nkochríxín.

<sup>18</sup>Kixin nixja sin kaín nkehe jínahña la ko sínkíhya, imá tjasin sin ijje la tóxríhín sin chojnichjin ókjé, ndá xíkaha tjachrdèxín sin ti sin nantá tjinkaon chrókuítóhe ti nkehe nduáhya. <sup>19</sup>Chrónka sin kixin chóna chojni kjuachaxin sich'e kaín nkehe, kjánchó jehe sin jehó nchexiteyéhe sin ti nkehe jínahña; méxra ti nkexro xitjahya tsítóhe ti ijje la ti ijje mé t'etuehen ti jehe sin. <sup>20</sup>Ti nkexro ó chóxin Ìnchéni Jesucristo ndá kuítóhe sin ti nkehe chrók'uitjáñaxín sin chroxí chjasintajni, andá chr'éxin chrókuákja sin ti ntja jínahña ínaá, la chrókjuacha ti jínahña chrókjuachròe ti jehe sin, ndá antsí náxrjónhña chrókóhen sin ke ti senó. <sup>21</sup>Ícha jína chróchóxinhña sin ti ntja jína, ke ti ó nohe sin ndá tsítóhe sin ti nkehe k'uetóan Díos. <sup>22</sup>\*Ti xíkaha la jehe sin ich'e sin éxi ti nkehe ndáchro chojni: “Ti konia t'ókjan la xíkjan inie ti nkehe t'ókjan, la ko ti kochíno nantá tsík'ónti, ikjan tikíankí nchet'o.”

### Ti ñao tsokjan Ìnchéni la í séhya

**3** <sup>1</sup>Kíchóni imá tjuahára, la tíhi ti xroon yóxin ikjian ts'ayéhéra. Yó ti xroon la ntáxráxinkaonra kixin jína chrókjuénkayáxinra.

<sup>2</sup>Xráxinkaonra ti nkehe tsíchronka ti sin k'uéchronka itén Díos ósé la ko ti nkehe k'uetóan Ìnchéni, ti nkexro tsaáxini, kjuako ti sin tsíkjejá ch'an.

<sup>3</sup>\*Tjínkaon chrókónohara kixin ti ñao tsjixixín la itsi chojni tsjanoá ti itan jína kuènté Ìnchéni, la sich'e sin kaín ti nkehe jínahña ndáchro asén sin. <sup>4</sup>La tsondáchro sin: “¿Nkehe kóhen ti ndáchro Cristo kixin tsokjan ch'an? Kixin ndesi ik'uén ti sin k'uaxrjeníxini la naxa xíkahó sítóhen éxi ndesi ti k'óna chjasintajni”, tsixro sin. <sup>5</sup>\*Ti chojni a la titekakonhña sin kixin ósé jehó nixja Díos la k'óna ti nkajní la ko chjasintajni, la sákjuí ti ìntà ókjé ndá kuítóhe nonte xámá. <sup>6</sup>\*Andá k'uaniá ichrin tsanká ndá ti ìntà mé k'uitjáñaxín chjasintajni la kjuatjoá sin. <sup>7</sup>Andá ti nkajní la ko ti chjasintajni chóxini ijje, mé tjejóchóhen tsochexín ti xrohi ti ñao tsjixixín kixin xíkaha k'uetóan Díos, ti ó tsitoxín ijje chojni la ko kaín ti sin jínahña tsjasóte sin.

<sup>8</sup>\*Méxra, kíchóni, chrók'uitjáñahñara kixin

Ìnchéni la ijnko ñao la t'ikon ch'an éxi mil nánó la ko mil nánó mé t'ikon ch'an éxi ijnko ñao ó. <sup>9</sup>Ìnchéni la í séhya ndá sinchexiteyá ch'an ti nkehe tsíndáchro ch'an, la jehya éxi tjenkayáxin chojni ndáchro kixin ó imá isé tjejóchóhen sin. Náhí. Tjechóhen ch'an kixin ninkexró chrók'uitjáñahña, kixin tjinkaon ch'an kixin kaín chojni chrókjan sin chrókuitekaon sin Díos.

<sup>10</sup>\*Kjánchó ti ñao tsokjan Ch'an la tsohen éxi ti ñao itji ijnko xíchee xíkaha. Andá ti nkajní la ts'itjáña, la nchónhña kjuachrakon ts'ixin, ts'ixin kjonta nkajní la kaín ti nkehe síin nkajní la ts'itjáña, tsoche la ko ti chjasintajni la tsoche la ko tsoche kaín ti nkehe síin ntihi.

<sup>11</sup>Méxra ti xíkaha tsohen ts'itjáña kaín nkehe, la jahara antsí jína chrók'uejora chrókuinkachónkira Díos. <sup>12</sup>Chrok'uejochóhénra ti ñao itsi Díos la chrókóxakohanra chrók'uejora jína chrókjuich'era ixra kuénté Ìnchéni kixin tjoka chrókui ch'an. Ti ñao a la tsoche ti nkajní, la ts'itjáña, la ko kaín nkehe síin chjasintajni la tsatanka kixin tsoche. <sup>13</sup>\*Kjánchó jeheni la t'ejóchóheni ti nkajní nixin la ko ti nonte nixin éxi tsíndáchro Díos tsjajon. Ntiha la imá náxrjón la ko kjuaxróxin ts'ejóni.

<sup>14</sup>Méxra, kíchóni, ti ñaxa tjejochóhénra kixin itsi ti ñao a, la kaín asánra nkojína chrók'uejora kixin ts'ikon Díos kixin kjuaxróxin tjejora, chontahyara ninkehó ijje.

<sup>15</sup>Chrokónohara kixin ñaxa tjechóhen Ìnchéni, tjokahya itsi ch'an kixin ñaxa iso chojni chrókuitekaon ti jehe ch'an. Kjaxin xíkaha tsíkjin kíchóni Pablo ti xroon chr'ahánra ch'an éxi ti kjuachaxien Díos k'uáyéhe ch'an. <sup>16</sup>Kaín ti xroon tsíkjin ch'an la nixja xíkaha, kjánchó iso tíhi la imá ixra tienxíni. Andá ti sin noehña la ko ti sin chaxínhña titekaon Ìnchéni la tienxínhña sin, ndá nduáhya tjako sin nkehe t'axrjexín ti nixja ti xroon tsíkjin ch'an, la ko kjaxin nduáhya tjako sin iso nkehe nixja xroon itén Díos. Ndá xíkaha jehó sin tjejá sin ti nkehe ts'itjáñaxín sin.

<sup>17</sup>Méxra kíchóni, ti ó nohara tíhi, ndá chrókóxakohanra kixin chrókjuachróehyara ti kjuach'ia xriko ti sin jínahña, la chrókuítóéhyara ti nkehe jína tinkachónkira. <sup>18</sup>Ícha jína antsí chróchoxínra Ìnchéni Jesucristo, ti nkexro tsaáxini la ko antsí chrók'uánkí ti tjehéra kichuara. Méxra tsjikosáyehe ni ch'an ijje la ko nkochríxín. Mé xíkaha tsohen.